



Broj: 02-14-1898/19-AP-2  
Datum: 10.10.2019. godine

Na osnovu člana 3. Zakona o budžetima u Federaciji Bosne i Hercegovine („Službene novine FBiH“, broj: 102/13, 9/14, 13/14, 8/15 i 102/15), člana 2. Zakona o trezoru u Federaciji Bosne i Hercegovine („Službene novine Federacije BiH“, broj: 26/16), uz primjenu Pravilnika o utvrđivanju i načinu vođenja registra budžetskih korisnika („Službene novine Federacije BiH“, broj: 30/14), i člana 25. Statuta Općine Zavidovići („Službeni glasnik Općine Zavidovići“, broj: 5/08 i 5a/08), Općinsko vijeće na \_\_. sjednici održanoj dana \_\_. \_\_. 2019. godine donosi

## ODLUKU

o načinu i kriterijima za uspostavu Registra budžetskih korisnika Općine Zavidovići

### I OPĆE ODREDBE

#### Član 1.

Ovom Odlukom utvrđuje se način uspostave Registra budžetskih korisnika Općine Zavidovići (dalje u tekstu: Registar), kriteriji za definisanje budžetskih korisnika, sadržaj registra, način upisa u Registar, način brisanja iz Registra, način vođenja i obaveze i odgovornosti za vođenje Registra.

#### Član 2.

- (1) Registar se uspostavlja u Službi za upravu ekonomskih poslova i poduzetništva (dalje u tekstu: Nadležna služba).
- (2) Nadležna služba je obavezna da vodi registar i odgovorna je za ispravnost, ažurnost i tačnost svih podataka unesenih u Registar.

### II UTVRĐIVANJE BUDŽETSKIH KORISNIKA

#### Član 3.

Budžetski korisnici Budžeta općine Zavidovići (dalje u tekstu: budžetski korisnici) su oni korisnici kod kojih su ispunjeni svi slijedeći uslovi:

- a) Da je osnivač Općinsko vijeće Zavidovići.
- b) Da je aktivnost, prema Standardnoj klasifikaciji djelatnosti, dio aktivnosti za koje je odgovorna Općina po Statutu Općine Zavidovići.

- c) Da je za funkcionisanje aktivnosti, odnos između prihoda Budžeta općine Zavidovići i drugih izvora prihoda (vlastiti prihodi) više od 50% u korist prihoda iz Budžeta, a da te aktivnosti predstavljaju javnu funkciju koja mora biti dio rada javnih institucija i da:
- koriste kontni plan za budžet i budžetske korisnike
  - su navedeni u Registru.

#### Član 4.

Budžetski korisnici ne mogu biti udruženja, nevladine neprofitne organizacije, političke partije i stranke.

### III REGISTAR BUDŽETSKIH KORISNIKA

#### Član 5.

- (1) Registar je popis budžetskih korisnika koji sadrži podatke utvrđene članom 5. stav (1) Pravilnika o utvrđivanju i načinu vođenja registra budžetskih korisnika budžeta u Federaciji Bosne i Hercegovine (dalje u tekstu: Pravilnik).
- (2) Podatke iz Registra (RBK broj, naziv, adresa, ID broj) Nadležna služba objavljuje u „Službenom glasniku Općine Zavidovići“ svake godine, najkasnije do kraja maja tekuće godine za slijedeću budžetsku godinu.
- (3) Ako se status budžetskog korisnika utvrdi nakon isteka roka iz stava (2) ovog člana, podaci o budžetskom korisniku objavljuju se slijedeće godine.
- (4) Podaci iz Registra koji se ne objavljuju u „Službenom glasniku Općine Zavidovići“ javni su i dostupni u Nadležnoj službi.
- (5) Budžetski korisnici čiji podaci nisu navedeni i objavljeni u skladu sa stavom (2) ovog člana, smatraju se brisanim iz Registra.

#### Član 6.

- (1) Podaci o budžetskim korisnicima upisuju se u Registar na osnovu obrasca Registar budžetskih korisnika Općine Zavidovići (Obrazac RBK) čija su forma i sadržaj utvrđeni Pravilnikom.
- (2) Budžetski korisnici dostavljaju obrazac RBK Nadležnoj službi u roku od osam dana od dana osnivanja.
- (3) Nakon pribavljene saglasnosti Općinskog načelnika Nadležna služba je dužna u roku od osam dana od dana prijema RBK obrasca odlučiti o davanju saglasnosti za upis budžetskog korisnika u Registar, a nakon utvrđivanja ispunjavanja uslova propisanih članom 3. ove Odluke.
- (4) Općinski načelnik će, putem Nadležne službe uskratiti saglasnost za upis budžetskog korisnika u Registar ukoliko nema dovoljno finansijskih sredstava u budžetu za godinu za koju se podnosi zahtjev.

- (5) Nadležna služba potpisivanjem obrasca RBK daje saglasnost za upis budžetskog korisnika u Registar.
- (6) Dodjelom broja u Registru (RBK broj) Nadležna služba utvrđuje status budžetskog korisnika na osnovu člana 3. ove Odluke.
- (7) Obrazce RBK se popunjava i predaje samo jednom.
- (8) RBK broj je neponovljiv i ne može se mijenjati.

#### Član 7.

- (1) Budžetski korisnik može imati potrošačke jedinice.
- (2) Potrošačke jedinice su organizacione jedinice u sastavu pravnog lica – budžetskog korisnika (organi i općinske službe) koje nisu pravna lica i ne uvrštavaju se u Registar.

#### Član 8.

Brisanje iz Registra, upis novih korisnika, kao i sve druge promjene vrše se u skladu sa procedurama utvrđenim Pravilnikom.

### IV PRELAZNE I ZAVRŠNE ODREDBE

#### Član 9.

Rok za uspostavu Registra u skladu sa ovom Odlukom je 60 dana od dana stupanja na snagu ove Odluke.

#### Član 10.

Danom stupanja na snagu ove Odluke prestaje da važi Odluka broj: 01-14-2225/11 od 31.05.2011. godine („Službeni glasnik Općine Zavidovići“, broj: 5/2011).

#### Član 11.

Ova Odluka stupa na snagu narednog dana od dana objavljivanja u „Službenom glasniku Općine Zavidovići“, a primjenjivat će se od 01.01.2020. godine.

**PREDSJEDAVAJUĆI  
OPĆINSKOG VIJEĆA**

Redžo Seferović

## O B R A Z L O Ž E N J E

### I PRAVNI OSNOV ZA DONOŠENJE ODLUKE

Pravni osnov za donošenje Odluke o uspostavi Registra budžetskih korisnika Općine Zavidovići sadržan je u odredbama:

- člana 3. Zakona o Budžetima u Federaciji Bosne i Hercegovine („Službene novine FBiH“, broj: 102/13, 9/14, 13/14, 8/15 i 102/15), kojim je navedeno:

„Registar budžetskih korisnika uspostavlja i vodi ministarstvo finansija, odnosno služba za finansije prema propisanoj budžetskoj klasifikaciji u skladu sa propisom koji donosi Federalno ministarstvo finansija“;

- člana 3. Zakona o trezoru u FBiH („Službene novine FBiH“, broj: 26/16), kojim je navedeno:

„(1) Ministarstva finansija, gradovi, općine i vanbudžetski fondovi uspostavljaju i upravljaju trezorom.

(2) Trezorom kao osnovnom organizacionom jedinicom rukovodi pomoćnik ministra, odnosno rukovodilac službe za finansije.

(3) Trezor je nadležan obavljati sljedeće poslove: upravljanje novčanim sredstvima, upravljanje računima koji su u sistemu JRT, planiranje novčanih tokova, upravljanje plaćanjima, centralizirani obračun plaća, upravljanje računovodstvom u javnom sektoru i finansijsko izvještavanje o izvršenju budžeta.

(4) Trezor može, po potrebi, imati urede trezora i van svog sjedišta.“;

- Pravilnika o utvrđivanju i načinu vođenja registra budžetskih korisnika budžeta u Federaciji Bosne i Hercegovine („Službene novine Federacije BiH“, broj: 30/14), kojim su utvrđeni uslovi za definisanje budžetskih korisnika, te način vođenja Registra budžetskih korisnika i

- člana 25. stav (2) Statuta Općine Zavidovići, kojim je propisano da Općinsko vijeće „2. donosi odluke i druge opće akte kojima uređuje pitanja iz samoupravnog djelokruga Općine“.

### II RAZLOZI ZA DONOŠENJE ODLUKE

Općinsko vijeće Zavidovići donijelo je Odluku o uspostavi Registra budžetskih / proračunskih korisnika Općine Zavidovići, broj: 01-14-2227/11 od 31.05.2011. godine, a u skladu sa Zakonom o budžetima u Federaciji Bosne i Hercegovine („Službene novne FBiH“, broj: 19/06, 76/08, 5/09, 32/09, 9/10, 36/10, 45/10).

U međuvremenu je donesen novi Zakon o budžetima u Federaciji Bosne i Hercegovine („Službene novne FBiH“, broj: 102/13, 9/14, 13/14, 8/15 i 102/15) na osnovu kojeg je Federalno ministarstvo finansija donijelo Pravilnik o utvrđivanju i načinu vođenja registra budžetskih korisnika budžeta u Federaciji Bosne i Hercegovine („Službene novine FBiH“, broj: 30/14), kojim su propisani uslovi za definisanje budžetskih korisnika, te način vođenja Registra budžetskih korisnika.

Imajući u vidu da se započelo sa ispunjavanjem minimuma neophodnih uslova za faktički prelazak na trezorsko poslovanje, a sa ciljem usklađivanja sa navedenim propisima pristupilo se donošenju nove Odluke o uspostavi Registra budžetskih korisnika Općine Zavidovići, koji se dostavlja Općinskom vijeću Zavidovići na razmatranje i odlučivanje.

### III OBRAZLOŽENJE PREDLOŽENIH RJEŠENJA

- Članom 1. Odluke propisan je predmet Odluke,
- Članom 2. Odluke utvrđena je nadležnost Službe za upravu ekonomskih poslova i poduzetništva za uspostavu i vođenje Registra,
- Članom 3. Odluke utvrđeni su uslovi za definisanje budžetskih korisnika,
- Članom 4. Odluke utvrđena su ograničenja za definisanje budžetskih korisnika,
- Članom 5. i 6. Odluke utvrđeni su sadržaj i način vođenja Registra,
- Članom 7. Odluke utvrđen je pojam potrošačkih jedinica,
- Članom 8. Odluke utvrđen je način evidentiranja promjena u Registru,
- Članom 9. Odluke utvrđen je rok za uspostavu Registra,
- Članom 10. Odluke utvrđen je prestanak važenja postojeće Odluke,
- Članom 11. Odluke utvrđen je datum stupanja na snagu ove Odluke.

### IV FINANSIJSKA SREDSTVA

Za realizaciju ove Odluke nisu potrebna finansijska sredstva.

OPĆINSKI NAČELNIK

Dostavljeno:

mr. sci. Hašim Mujanović

1. Naslovu,
2. U spis.

Obradila: \_\_\_\_\_  
(Džeraldina Miličević)